

四庫全書

集部

欽定四庫全書

于湖集卷三十

宋 張孝祥 撰

墓誌

邕帥蔣公墓誌銘

乾道元年余守桂林初識潯州守蔣君德施是歲君趨
朝執政三人者共稱君之賢賜對擢守邕管其明年余
免歸江東君與邦人送余於興安置酒擊鮮乳洞之下

時方六月洞中極寒水如冰雪余與君褰裳脫履篝火入之凌兢石間題名賦詩火盡乃出於是君六十有二矣精神矍鑠未艾也又明年余帥長沙桂州舊僚以書來則云君至邕管死矣夫以君之豈弟慈祥忠信孝友而位與年纔止於此何耶桂州在二廣號稱士鄉其間固多賢然余之所與游者若君與石君惠叔其尤賢者也君之沒惠叔蓋亦前數月死故余甚悲之明年八月余帥荊州君之子礪自桂徒行數千里持惠叔之弟安

持狀君行事求銘於予予方謝府事未間礪至刺血為書以請夫以余悲君之心而礪之誠孝如此則烏可以不銘也君諱允濟為桂之興安人父熙以君贈奉直大夫其葬也得致堂先生胡公為之銘致堂道學高一世語不妄發奉直之銘可知也奉直力貧教二子君與其兄允升俱中紹興二年進士第歷柳州柳城尉容州普寧令改秩知邵州新化縣賀州富山縣新州教授通判賓州知潯州邕州於是朝廷方知君而上亦且試君於

豈將用君矣而君遂死積官朝請大夫君在州縣凡四十年一以恩信結民務安便之其出入期會皆與民先為要約無一切迫促之政嶺南取民無藝貧不堪則黠且強者往往羣為盜君所至常平其賦又設方畧盜畏之多去易業間發捕必得新化號難治姦民猾吏與寓客之有力者根株囊橐令不得一搖手即以危法中之君至屬爾俗為之變積歲不輸之租車牛係道庫廩皆溢會丁太夫人憂租未至縣者知君去復以歸相率數

百人遮部使者願奪君喪在富川適行經界鄙遠不素
習旁郡驚擾有死者君親為指畫條踈節披吏受其成
而民聽之從容訖事部使者取其法下諸郡嘗攝昭州
始官出錢二百予民輸布一匹既復折布為錢十倍之
君疏以聞竟減其半隆興詔書第良二千石君在潯州
為廣西第一嘗按平南巡檢祝尚賢奪一官及君喪過
潯尚賢哭舟中哀甚或問之曰曩我實犯法非公之私
公賢者我安得不哭邕州控蠻獠歲買國馬百貨所聚

君至盡蠲異時武臣散事馬大入諸蠻帖服至不敢相
讎殺死之日哭者罷市君娶於秦氏生四子砥碩早卒
次礪以君任將仕郎次確又娶王氏有女春娘君之孫
男女凡六人君葬以乾道四年八月丙申在興安縣之
趙村巨木塘二夫人祔焉銘曰

居也孝友仕也循良外甚和愉中乃峻剛惜乎生於南
方仕於南方天子方將用之於既老而君則嗇於數而
云亡也

朱安之墓誌銘

始某不識安之獨聞其賢於某之從父從父與安之游
相好也安之沒其子績績以誌文屬從父從父命某某
不得辭按安之朱氏諱敦仁出漢尚書令暉自會稽徙
鄞五世矣君生十年而孤慎終無違禮朱氏大族外內
千指君壹訓齊蓋居家嚴處已約與人恕自其少時則
有恢厚長者之稱矣舉進士不偶棄歸中歲家益豐益
務施鄰里緩急悉抵君未嘗以在亡辭也晚喜西方氏

學自謂有所得屬疾以後事戒諸子安卧而逝享年六十有九實紹興甲戌十有二月丁未也曾王父文偉王父用評父揆夫人徐氏四男子績也績也叔季早死二女子適王造劉崇造今為山陽簿孫男女十三人九齡九思九功九皋九德九澤九成女嫁董宏餘未行君葬以既歿後二年鄉曰句章原曰梅芝月以辛丑日以丙午銘曰

有淑如君卒不克施有承其休原實委之梅芝之封山

川鬱盤君於此藏既固既安

祭文

代諸父祭伯父文

維紹興二十六年歲次丙子十月己巳朔初六日甲戌
弟具位某等謹以清酌庶羞之奠致祭于先兄宮使待
制張公之靈嗚呼哀哉我家故微我祖則振何以振之
曰德與仁逮我先君其艱其勤益揚厥光而卒不信我
觀于鄉莫我之貧人孰我怨而咸我親化貪以廉易澆

以醇巍巍陰功與天理并鍾美于公克宏厥因先君是
師少則有稱游于黨庠頎然鳳麟蹕厲風發超逸絕塵
徒步入關蜚聲成均擢第以歸謂當親榮陟岵告凶街
哀茹辛終喪筮仕浙河之濱攜我諸季奉先夫人則孝
則慈仰事俯循家徒壁立穆然春溫邊庭失守京關纏
氛慟哭仰天上書扣閣投童逋誅樞臣提軍以公參籌
亟奏厥勲帝庸寵嘉召見紫宸公矢其謀慷慨自陳忠
憤激發肝膽輪囷主辱臣死臣敢愛身願張皇威于彼

強鄰宗伯之長異數式敦黃金九環車朱兩輪我出我
疆虎狼續紛驅脅使從九死是瀕公曰我死本朝則尊
強項不屈志士氣伸義動北人北人逡巡顧視介者既
降而髡公欲斬之懼而宵奔敵繫維公俘囚與羣沙漠
雪積煙雲塵昏一節起居面黧膚皸飢腸齧齕凍衣結
鶉懷闕傾日思親望雲引脰南鄉淚乾聲吞生還何時
十五秋春天子憐公番番良臣我圖爾功其贊國鈞柄
臣忌公公歌小旻外祠延閣淹留海濱母子白首綵衣

更新世賞之渥燕及弟昆風木不停艱疚荐臻三年廬墓羸然哀斃終老抱疾齋廚無葷姦慝既屏公道乃申一麾池陽起膺帝綸布政未月恩惠浹淪條疏節披剔蠹理焚引疾遽還莫諭所云嗚呼哀哉小留歸裝桐川之陰忽與諸公告訣周諄曰悟大命傾于浹旬乃作治命累數千言書之簡編標列縷分必以我喪歸葬四明徧告朋友及郡守丞又移我書如前之陳我之得書震懼以驚此豈戲耶抑有其徵遽往侍公何疾之嬰飲酒

賦詩歡如平生惟是後前棺槨衣衾我苦謂公棄此弗
貞公笑不荅促我以行六月乙未公之初生疇昔之夜
既沐而薰顧謂諸孤汝眠勿興寢以衣冠寂無聞聲旦
起視公則公既薨體柔色敷蟬蛻之輕嗚呼哀哉使以
訃行于杭于昇我與季聞糜肝沸心奔走會喪籲天不
聞念我先兄大我宗祊我輩宦學須公以成胥保胥訓
先子是承有德未報去騎箕星二叔安鄂欲來弗能手
足同體翦焉摧傾嗚呼哀哉我公之生松貞蘭芬金石

其剛永鑑之清終始大節紀在汗青尚須鴻儒墓隧其
銘嗚呼哀哉公之文章如漢兩京渾渾其全鑿鑿其精
揮毫落筆龍蛇矯騰一斗百篇紙價為增敬用纂輯昇
之雲仍嗚呼哀哉我取遺訓一一作程迺茲諸孤婚嫁
教令我輩任責其敢弗欽有渝此言豈無鬼神嗚呼哀
哉寔窆之期卜此歲零小留于郊其居則寧諸孤在傍
以妥厥靈逝者不留三虞是臨帝有密章賁于幽局匪
作斯文惟以薦誠尚饗

代焚黃祭文

嗚呼皇考之德信于鄉黨而卒不昌其身以啓其後人
不生享榮養而惟有密章之寵以賁于幽局嗚呼哀哉
我之元昆躬承慈訓以大吾家諸弟因仍紳冕則華兄
列從班某仕于朝室有妻孥衣豐食饒念我先君其艱
其勤生我劬勞至于成人菽水之奉曾不一日不孝之
責昊天罔極兩秩賜褒匪敢云報天子有命弗敢弗告
嗚呼哀哉尚饗

亡妻時氏宿告文

嗚呼哀哉自癸未至于戊子吾婦之死於是六日矣越
己丑將殯于寶林之佛寺以俟卜吉而藏焉嗚呼哀哉
爾尚知之乎否

起靈

嗚呼已矣無可言者矣以是為爾之遣奠嗚呼哀哉

最

嗚呼哀哉吾王母馮夫人皇妣孫夫人實葬四明吾父

母之命將以汝從之吾官于朝未能持汝喪以往也是
以卜葢于此嗚呼哀哉汝奉佛素謹屬纊而誦佛之聲
猶不絕今使汝依佛以居吾又時節視汝惟謹汝其安
之嗚呼哀哉

于湖集卷三十

欽定四庫全書

于湖集卷三十一

宋 張孝祥 撰

樂府

六州歌頭

長淮望斷，闕塞莽然平。征塵暗，霜風勁，悄邊聲。黯銷凝。
追想當年事，殆天數，非人力。洙泗上，絃歌地，亦殫爭。隔
水蘊鄉，落日牛羊下，區脫縱橫。看名王宵獵，騎火一川。

明笳鼓悲鳴遣人驚
念腰間箭匣中
劍空埃蠹竟何
成時易失心徒壯
歲將零渺神京
干羽方懷遠靜
烽燧且休兵
冠蓋使紛馳
驚若為情聞道
中原遺老常南望
翠葆霓旌使行人
到此忠憤氣填膺
有淚如傾

水調歌頭
為摠得居士壽

隆中三顧客
圯上一編書
英雄當日感會
餘事了
寰區千載神交
二子一笑眇然
茲世卻願駕柴車
長憶淮南岸
耕釣混樵漁
忽扁舟凌駭浪
到三吳
綸巾羽扇容

與爭看列仙儒不為尊
鑪笠澤便掛衣冠神武此興渺
江湖舉酒對明月高曳九霞裾

又 凱歌上劉恭父

猩鬼嘯篁竹玉帳夜分弓
少年荆楚劒客突騎錦襜紅
千里風飛雷厲四校星流
彗掃蕭斧剉春蔥談笑青油
幕日奏捷書同 詩書帥黃閣
老黑頭公家傳鴻寶祕
略小試不言功聞道璽書頻
下看即沙堤歸去帷幄且
從容君王自神武一舉朔庭空

又 泛湘水

濯足夜灘急，晞髮北風涼。
吳山楚澤行偏只，欠到瀟湘。
買得扁舟歸去，此事天公付我。
六月下滄浪。蟬蛻塵埃外，蝶夢水雲鄉。
製荷衣，紉蘭佩，把瓊芳。
湘妃起舞，一
笑撫瑟奏清商。喚起九歌忠憤，拂拭三閭文字，還與日爭光。
莫遣兒輩覺，此樂未渠央。

又 金山觀月

江山自雄麗，風露與高寒。
寄聲

一本作牋

月姊借我玉鑑此

中看幽壑魚龍悲嘯倒影星辰搖動海氣夜漫漫湧起
白銀闕危駐紫金山表獨立飛霞珮切雲冠漱冰濯
雪眇視萬里一毫端回首三山何處聞道羣仙笑我要
我欲俱還揮手從此去翳鳳更驂鸞

又 汪德邵無盡藏

淮楚襟帶地雲夢澤南州滄江翠壁佳處突兀起紅樓
憑仗使君曾次與問老仙何在長嘯俯清秋試遣吹簫
看騎鶴恐來游欲乘風凌萬頃汎扁舟山高月小霜

露既降凜凜不能留一弔周郎羽扇尚想曹公橫槊興
廢兩悠悠此意無盡藏分付水東流

又 隱靜山觀雨

青嶂度雲氣幽壑舞回風山神助我竒觀喚起碧霄龍
電掣金蛇千丈雷震靈鼉萬疊洶洶欲崩空盡瀉銀潢
水傾入寶蓮宮 坐中客凌積翠看奔洪人間應失乂
筋此地獨從容洗了從來塵垢潤及無邊焦槁造物不
言功天宇忽開霽日在五雲東

又 桂林集句

五嶺皆炎熱，宜人獨桂林。
江南驛使未到，梅蘂破春心。
繁會九衢三市，縹緲層樓傑觀。
雪片一冬深，自是清涼國。
莫遣瘴煙侵江山，好青羅帶碧玉簪。
平沙細浪欲盡陡起，忽千尋。
家種黃柑丹荔，戶拾明珠翠羽。
簫鼓夜沉沉，莫問驂鸞事。
有酒且頻斟。

又 桂林中秋

今夕復何夕，此地過中秋。
賞心亭上，喚客追憶去年游。

千里江山如畫萬井笙歌不夜扶路看遨頭玉界擁銀
闕珠箔卷瓊鈎馭風去忽吹到嶺邊州去年明月依
舊還照我登樓樓下水明沙靜樓外參橫斗轉搔首思
悠悠老子興不淺聊復此淹留

又和龐佑父

雪洗戰塵靜風約楚雲留何人為寫悲壯吹角古城樓
湖海平生豪氣闕塞如今風景剪燭看吳鉤賸喜然犀
處駭浪與天浮憶當年周與謝富春秋小喬初嫁香

囊未解勲業故優游赤壁磯頭落照肥水橋邊衰草渺
渺喚人愁我欲乘風去擊楫誓中流

又為時傳之壽

雲海漾空濶風露凜高寒仙翁鶴駕羽節縹緲下天端
指點虛無征路時見雙鳬飛舞揮斥隘塵寰吹笛向何
處海上有三山綵衣新魚服麗更朱顏蟠桃未熟千
歲容與且人間早晚金泥封詔歸侍玉皇香案踵武列
仙班玉骨自難老未用九霞丹

又為方務德侍郎壽

紫橐論思舊碧落拜除新內家勅使傳詔親付玉麒麟
千里江山增麗是處旌旗改色佳氣鬱輪囷看取連宵
雪借與萬家春建崇牙開盛府是生辰十州老稚都
向今日祝松椿多少活人陰德合享無邊長筭惟有我
知君來歲更今日一氣轉洪鈞

又垂虹亭

艤棹太湖岸天與水相連垂虹亭上五年不到故依然

洗我征塵三斗快
揖商飈千里鷗
鷺亦翩翩
身在水晶闕
真作馭風仙
望中秋無五日
月還圓
倚欄清嘯孤
發驚起壑龍眠
欲酹鴟夷西子
未辦當年功業
空繫五湖船
不用知餘事
尊鱠正芳鮮

又送劉恭父趨朝

鼇禁輟頗收熊軾
賴龔黃一時林莽
千險
蠶午要驅攘
金版六韜初試煙
斂山空野迴
低草見牛羊
旒纁釋南顧
戈甲濯銀潢
璽書下褒懿
績促曹裴帝宸天
近紅

旆東去帶朝陽歸輔五雲丹陛回首楚樓千里遺愛滿
瀟湘應記依劉客曾此奉離觴

多麗

景蕭疎楚江那更高秋遠連天茫茫都是敗蘆枯蓼汀
洲認炊煙幾家蝸舍映夕照一簇漁舟去國雖遙寧親
漸近數峯青處是吾州便乘取波平風靜荃棹且夷猶
闌情有冥冥去鴈拍拍輕鷗忽追思當年往事惹起
無限羈愁拄笏朝來多爽氣秉燭夜永足清游翠袖香

寒朱絃韻悄無情江水只東流
柂樓晚清商哀怨還聽
隔船謳無言久餘霞散綺煙際帆收

木蘭花慢

送歸雲去鴈澹寒采滿溪樓正
佩解湘腰釵孤楚鬢鸞
鑑分收凝情望行處路但踈煙遠
樹纖離憂只有樓前
溪水伴人清淚長流
霜華夜永逼衾裯喚誰護衣篝
念粉館重來芳塵未掃爭見嬉游
情知悶來殢酒奈迴
腸不醉只添愁脉脉無言竟日斷
魂雙鶩南州

又

紫簫吹散後恨燕子只空樓念壁月長虧玉簪中斷覆
水難收青鸞送碧雲句道霞扃霧鎖不堪憂情與文梭
共織怨隨宮葉同流 人間天上兩悠悠暗淚灑燈篝
記谷口園林當時驛舍夢裏曾游銀屏低聞笑語但醉
時冉冉醒時愁擬把菱花一半試尋高價皇州

水龍吟

望九華山作

竹輿曉入青陽細風涼月天如洗峰回路轉雲舒霞卷

了非人世轉就丹砂鑄成金鼎碧光相倚料天闕虎守
箕疇龍負開神祕留茲地 縹緲珠幢羽衛望蓬萊初
無弱水仙人拍手山頭笑我塵埃滿袂春鎖瑤芳霧迷
芝圃昔遊都記悵世緣未了匆匆又去空凝竚煙霄裏

又過浯溪

平生只說浯溪斜陽喚我歸船繫月華未吐波光不動
新涼如水長嘯一聲山鳴谷應栖禽驚起問元顏去後
水流花謝當年事憑誰記 須信兩翁不死駕飛車時

遊茲地漫郎宅裏中興碑下應留屐齒酌我清尊洗公
孤憤來同一醉待相將把袂清都歸路騎鶴去三千歲

念奴嬌 過洞庭

洞庭青草近中秋更無一點風色玉鑑瓊田三萬頃著
我扁舟一葉素月分輝明河共影表裏俱澄澈悠然心
會妙處難與君說應念嶺海經年孤光自照肝肺皆
冰雪短髮蕭騷襟袖冷穩泛滄浪空濶盡吸西江細斟
北斗萬象為賓客扣舷獨笑不知今夕何夕

又 張仲欽提刑行邊

弓刀陌上淨蠻煙
瘴雨朔雲邊
雪幕府橫驅三萬里
一把平安遙接方丈三
韓西山八詔慕義羞
椎結梯航入貢路
經頭痛身熱
今代文武通人青霄
不上卻把南州節
敵馬秋肥鷗力健
應看名王宵獵壯士
長歌故人一笑趣得
梅花月王春奏計便
須平步清切

又 欲雪呈朱漕元順

朔風吹雨送淒涼
天氣垂垂欲雪萬里
南荒雲霧滿弱

水蓬萊相接凍合龍岡寒侵銅柱碧海冰漸結憑高一
笑問君何處炎熱家在楚尾吳頭歸期猶未對此驚
時節憶得年時貂帽煖鐵馬千羣觀獵狐兔成車笙歌
隱地歸踏層城月持杯且醉不須壯望淒切

又再和

繡衣使者度郢中絕唱陽春白雪人物應須天上去一
日君恩三接粉省香濃宮牀錦重更把絲絢結臣心如
水不教炙手成熱還記嶺海相從長松千丈映我秋

竿節忍凍推敲清興滿風裏烏巾獵獵只要東歸歸心
入夢夢泛寒江月不因尊鱠白頭親望真切

又

星沙初下望重湖遠水長雲漠漠一葉扁舟誰念我今
日天涯飄泊平楚南來大江東去處處風波惡吳中何
地滿懷俱是離索常記送我行時綠波亭上泣透青
羅薄檣燕低飛人去後依舊湘城簾幕不盡山川無窮
煙浪辜負秦樓約漁歌聲斷為君雙泪傾落

醉蓬萊 為老人壽

問人間榮事海內高名似今誰比脫屣歸來眇浮雲富
貴致遠鉤深樂天知命且從容閱世火候周天金文滿
義從來活計有酒一尊有棋一局少日親朋舊家隣
里世故紛紜但蚊蚋過耳解慍薰風做涼梅雨又一般
天氣曲几蒲團綸巾羽扇年年如是

雨中花

一葉凌波十里馭風煙鬟霧鬢蕭蕭認得蘭皋瓊珮水

館冰綃秋霽明霞乍吐曙涼宿霽初消恨微顰不語少
進還收竚立迢迢神交冉冉愁思盈盈斷魂欲遣誰
招猶自待青鸞傳信烏鵲成橋悵望胎仙琴疊忍看翡
翠蘭若夢回人遠紅雲一片天際笙簫

二郎神

七夕

坐中客共千里瀟湘秋色漸萬寶西成農事了穠稔看
黃雲阡陌喬口橘洲風浪穩嶽鎮聳倚天青壁追前事
興亡相續空與山川陳迹南國都會繁盛依然似昔

聚翠羽明珠三市滿樓觀湧參差金碧乞巧處家家追
樂事爭要做豐年七夕願明年強健百姓歡娛還如今
日

轉調二郎神

悶來無那暗數盡殘更不寐念楚館香車吳溪蘭棹多
少愁雲恨水陣陣回風吹雪霰更旅鴈一聲沙際想靜
擁孤衾頻挑寒燄數行珠淚凝睇傍人笑我終朝如
醉便錦織回鸞素傳雙鯉難寫衷腸密意綠鬢點霜玉

肌消雪兩處十分憔悴爭忍見舊時娟娟素月照人千里

于湖集卷三十一

欽定四庫全書

于湖集卷三十二

宋 張孝祥 撰

樂府

滿江紅

秋滿蘅皋煙蕪外吳山歷歷風乍起蘭舟不住浪花搖
碧離岸櫓聲驚鷺漸遠盈襟淚顆淒猶滴問此情能有幾
人知新相識 追往事歡連夕經舊館人非昔把輕輦

淺笑細思重憶紅葉題詩誰與寄青樓薄倖空遺迹但
長洲茂苑草萋萋愁如織

又于湖懷古

千古淒涼興亡事但悲陳迹凝望眼吳波不動楚山叢
碧巴滇綠駿追風武昌雲旆連江赤笑老姦遺臭到
如今留空壁邊書靜烽煙息通輶傳銷鋒鏑仰太平
天子坐收長策蹴踏揚州開帝里渡江天馬龍為匹看
東南佳氣鬱葱葱傳千億

又思歸寄柳州

秋滿灘

一本作湘

源瘴雲靜曉山如簇動遠思空江小艇高

丘喬木策策西風雙鬢底暉暉斜日朱欄曲試側身回

首望京華迷南北思歸夢天邊鵲游宦事蕉中鹿想

一年好處砌紅堆綠羅帕分柑霜落齒冰盤剝芡珠盈

掬倩春纖縷鱣搗香薤新筍熟

青玉案

餞別劉恭父

紅塵冉冉長安路看風度凝然去唱徹陽關留不住甘

棠庭院芰荷香渚盡是相思處
龜魚從此誰為主好
記江湖斷腸句萬斛離愁休更訴
洞庭煙棹楚樓風露
去作為霖雨

洞仙歌

和清虛先生皇甫坦韻

清都絳闕我自經行慣
壁月帶珠星引鈞天笙簫不斷
寶簪瑤珮玉立拱清班
天一笑物皆春結得清虛伴
還丹九轉凡骨親曾換
攜劍到人間偶相逢依然青眼
狂歌醉舞心事有誰知
明月下好風前相對綸巾岸

蝶戀花 行湘陰

漠漠飛來雙屬玉一片秋光染就瀟湘綠雪轉寒蘆花
簌簌晚風細起波紋縠落日閒雲歸意促小倚蓬窗
寫作思家曲過盡碧灣三十六扁舟只在灘頭宿

又 懷于湖

恰到杏花紅一樹揶揄來時結子青無數漠漠春陰纏
柳絮一天風雨將春去春到家山須小住芍藥櫻桃
更是尋芳處遶院碧蓮三百畝留春伴我春應許

又送劉恭父

畫戟旂閒刀入鞘
安石榴花影落紅欄小
似勸先生須飲
醕枕中鴻寶微傳妙
袞袞鋒車還急詔
滿眼瀟湘
揔是恩波渺
歸去槐庭思楚嶠
觚稜月曉期分照

又送姚主管橫州

君泛仙槎銀海去
後日相思地角天涯路
草草杯盤深
夜語冥冥四月黃梅雨
莫拾明珠并翠羽
但使邦人愛我如慈母
待得政成民按堵
朝天衣袂翩翩舉

鷓鴣天

上元設醮

詠徹瓊章夜向闌
天移星斗下人間
九光倒影騰青簡
一氣回春遶絳壇
瞻北闕
祝南山
遙知仙仗簇清班
何人曾侍傳柑宴
翡翠簾開識聖顏

又

子夜封章扣紫清
五霞光裏珮環聲
驛傳風火龍鸞舞
步入煙霄孔翠迎
瑤簡重羽衣輕
金童雙引到通明
三湘五管同民樂
萬歲千秋與帝齡

又

憶昔追遊翰墨場，武夷仙伯較文章。
琅函奏號銀臺省，璽筆書名御苑牆。
經十載過三湘，橫楣麗錦照傳觴。
醉餘吐出胸中墨，只欠彭宣到後堂。

又

月地雲堦歡意闌，仙姿不合住人間。
驂鸞已恨車塵遠，泣鳳空餘燭影殘。
情脉脉，淚珊珊，梅花音信隔關山。
只應楚雨清留夢，不耐吳霜綠易斑。

又提刑仲欽行部萬里閱四月
而後來歸輒成為太夫人壽

去日清霜菊滿簾歸來高柳絮纏空長驅萬里山收瘴
徑度層波海不風陰德徧嶺西東天教慈母壽無窮
遙知今夕稱觴處衣綵還將衣繡同

又為老母壽

阿母蟠桃不記春長沙星裏壽星明金花羅紙新裁詔
貝葉旁行別授經同犬子祝龜齡天教二老鬢長青
明年今日稱觴處更有孫枝滿謝庭

欽定四庫全書

卷三十二

又 贈錢橫州子山

舞鳳飛龍五百年盡將錦繡裏山川王家券冊諸孫嗣
主第笙歌故國傳 居玉鉉擁金蟬祗今門戶慶蟬聯
君侯合侍明光殿且作橫槎海上仙

又 饒劉恭父

浴殿西頭白玉堂湘江東畔碧油幢北辰躔次瞻星象
南國山川解印章 隨步武謝恩光送公歸趣舍人裝
它年若肯傳衣鉢今日應須酌壽觴

又 淮西為老人壽

晝得游嬉夜得眠
農桑欲徧楚山川
問看百姓知公否
餘子紛紛定不然
思主眷酌民言與民稱壽拜公前
只將心與天通處
合住人間五百年

又 餞劉恭父

割鐙難留乘馬東
花枝爭看裊長紅
袞衣空使斯民戀
綠竹誰歌入相同
回武事致年豐
幾多遺愛在湘中
須知楚水楓林下
不似初聞長樂鐘

又 平國弟生日

楚楚吾家千里駒
老人心事正闕渠
風流合是堦除玉
愛惜真成掌上珠
紆綵綬薦芳壺
老人還醉弟兄扶
問將何物為兒壽
付與家傳萬卷書

又 荊州別同官

又向荊州住半年
西風催放五湖船
來時露菊團金顯
去日池荷疊綠錢
斟別酒扣離絃
一時賓從最多賢
今宵拚醉花迷坐
後夜相思月滿川

又

憶昔彤庭望日華，忽忽枯筆夢生花。
鬱輪袍曲慙新奏，風送銀灣犯斗槎。
追往事，甫新瓜。飛蓬何事及蘭麻。
一江湘水流餘潤，十里河堤築淺沙。

又

瞻蹕門前識箇人，柳眉桃臉不勝春。

一本作香車
油壁照彫輪

短襟

衫子新來棹四直，冠兒內樣新。
秋色淨，曉粧勻，不知

何事在風塵。主翁若也憐幽獨，帶取妖嬈上玉宸。

虞美人

贈盧堅叔

盧敖夫婦驂鸞侶相敬如賓主森然蘭玉滿尊前舉按
齊眉樂事看年年我家白髮雙垂雪已是經年別今
宵歸夢楚江濱也學君家兒子壽吾親

又代季弟壽老人

雪花一尺江南北薪盡炊無粟老仙活國試刀圭十萬
人家生意與春回天公一笑疇陰德賜與長生籍今
朝雪霽壽尊前看我雙親都是地行仙

又無為作

雪消煙漲清江浦
碧草春無數
江南幾樹夕陽紅
點點歸帆吹盡晚來風
樓頭自摩挲
昭華管我已無腸
斷斷行雙鴈
向人飛織錦
回文空在寄它誰

又

溪西竹榭溪東路
溪上山無數
小舟却在晚煙中
更看蕭蕭微雨打疎篷
無聊情緒如中酒
此意君知否
年時曾向此中行
有箇人人相對坐調箏

又

柳梢梅萼春全未誰會傷春意一年好處是新春柳底
梅邊只欠那人人憑春約住梅和柳略待些時候錦
帆風送綵舟來却遣香苞嬌葉一齊開

又

羅衣怯雨輕寒透陡做傷春瘦箇人無奈語佳期徙倚
黃昏池閣等多時當初不似休來好來後空煩惱倩
人傳語更商量只得千金一笑也甘當

鵲橋仙

邢少連送茉莉

北窗涼透南窗月上浴罷滿懷風露不知何處有花來
但恠底清香無數炎州珍產吳兒未識天與幽芳獨
步冰肌玉骨歲寒時倩閒止堂中留住

閒止少連堂名

又落梅

吹香成陣飛花如雪不那朝來風雨可憐無處避春寒
但玉立仙衣數縷清愁萬斛柔腸千結醉裏一時分
付與君不用嘆飄零待結子成陰歸去

又

橫波滴素遙山蹙翠江北江南腸斷不知何處馭風來
雲霧裏釵橫鬢亂香羅疊恨蠻牋寫意付與瑤臺女
伴醉時言語醒時羞道醒了休教再看

又 平國弟生日

湘江東畔去年今日堂上簪纓羅綺弟兄同拜壽尊前
共一笑歡歡喜喜渚宮風月邊城鼓角更好親庭一
醉醉時重唱去年詞願來歲強如今歲

又以酒果為黃子默壽

南州名酒北園珍果都與黃香為壽
風流文物是家傳
晚血指旁觀袖手
東風消息西山爽氣總聚君家戶
牖舊時曾識玉堂仙在帝所頻開薦口

又戲贈吳伯承侍兒

明珠盈斗黃金作屋占了湘中秋色
金風玉露不勝情
看天上人間今夕
枝頭一點琴心三疊
筭有詩名消得野堂從此不蕭疎
問何日尊前喚客

又別立之

黃陵廟下送君歸去上水船兒一隻離歌聲斷酒杯空
容易裏東西南北重湖風月九秋天氣冉冉清愁如
織我家住在楚江濱為頻寄雙魚素尺

又為老人壽

東明大士吾家老子是一元知非二共攜甘雨趣生朝
做萬里豐年歡喜司空山上長沙星裏乞與無邊祥
瑞仙家日月鎮常春笑人說長生久視

南鄉子

送朱元晦行張敬夫邢少連同集

江上送歸船風雨排空浪拍天
賴有清尊澆別恨悽然
寶蠟燒花看吸川
楚舞對湘絃
煖響圍春錦帳
氍毹坐
上定知無俗客
俱賢便是朱張與少連

畫堂春

上老母壽

蟠桃一熟九千年
仙家春色無邊
畫堂日煖卷非煙
畫
永風妍
看取疏封湯沐
何妨頻棹觥船
方瞳綠髮對
儒仙歲歲尊前

于湖集卷三十二

欽定四庫全書

于湖集卷三十三

宋 張孝祥 撰

樂府

柳梢青 餞別蔣德施

重陽時節滿城風雨更催行色隴樹寒輕海山秋老清
愁如織 一杯莫惜留連我亦是天涯倦客後夜相思
水長山遠東西南北

又

元宵何高士
說京師舊事

今年元夕探盡江梅都無消息
草市梢頭柳莊深處雪
花如席一尊鄰里相過也
隨分移時換節玉輦端門
紅旗夜市憑君休說

又

探梅

溪南溪北玉香消盡翠嬌無力
月淡黃昏煙橫清曉都
無消息無聊更遶空枝斷魂
遠重招怎得驛使歸來
戍樓吹斷空成悽惻

踏莎行

楊柳東風海棠春雨
清愁冉冉無來處
曲徑驚飛蛺蝶
叢回塘凍濕鴛鴦侶
舞徹霓裳歌殘金縷
靡蕪白芷
愁煙渚不識陽臺夢裏
雲試聽華表歸來語

又

長沙牡丹花極小戲作此詞并以
二枝為伯承敬夫諸兄一觴之薦

洛下根株江南栽種
天香國色千金重
花邊三閤建康
春風前十里揚州夢
油壁輕車青絲短轡
看花日日
催賓從而今何許
定王城一枝且為鄰翁送

又 荆南作

旋葺荒園初開小徑物華還與東風競曲檻暉暉落照
明高城冉冉孤煙暝柳色金寒梅花雪靜道人隨處
成幽興一杯不惜小淹留歸期已理滄浪艇

又

萬里扁舟五年三至故人相見尤堪喜山陰乘興不須
回毗耶問疾難為對不藥身輕高談心會匆匆我又
成歸計它時江海肯相尋綠蓑青蒻看清貴

又 五月十三日月甚佳

藕葉池塘榕陰庭院年時好月今宵見雲鬟玉臂共清
寒冰綃霧縠誰裁剪撲粉輕綿侵塵寶扇遙知掩抑
成淒怨去程何許是歸程離觴為我深深勸

又 送別劉子思

古屋藪祠孤舟野渡長年與客分攜處漠漠愁陰嶺上
雲蕭蕭別意溪邊樹我已北歸君方南去天涯客裏
多歧路須君早出瘴煙來江南山色青無數

又壽黃堅叟併以送行

時雨初晴詔書隨至邦人父老為君喜十年江海始歸
來祥曦殿裏攬班對日月開明風雲感會切須穩上
平戎計天教慈母壽無窮看君黃髮腰金貴

又為朱漕壽

桂嶺南邊湘江東畔三年兩見生申旦知君心地與天
通天教仙骨年年換起此秋風乘槎霄漢看看黃紙
書來喚但令丹鼎汞頻添莫辭酒盞春無筭

醜奴兒

張仲欽母夫人壽

年年有箇人生日誰似君家誰似君家八十慈親髮未
華棠陰閣上棠陰滿滿勸流霞滿勸流霞來歲應添
宰路沙

又張仲欽生日用前韻

伯鸞德耀賢夫婦見說宜家見說宜家庭砌森森長玉
華天公遣注長生籍服日食霞服日食霞壽紀應須
海筭沙

又王公澤為予言
查山之勝戲贈

十年聞說查山好何日追遊木落霜秋夢想雲溪不耐
愁 主人好事長留客尊酒夷猶一笑登樓興在西峯
上上頭

又

十分濟楚邦之媛此日追遊雨霽雲收夢入瀟湘不耐
愁 主人白玉堂中老曾侍凝旒酒酌瓊舟即上虛皇
香案頭

又

珠燈壁月年時節纖手同攜今夕誰知自撚梅花勸一
卮逢人問道歸來也日日佳期管有來時起得收燈
也未遲

又

無雙誰似黃郎子自鄙無譏月滿星稀想見歌場夜打
圍畫眉京兆風流甚應賦蛭蟻楊柳依依何日文簫
共駕歸

浣溪沙

劉恭父席上

卷旗直入蔡州城只倚精忠不要兵
前營半夜落妖星
萬旅雲屯看整暇十眉環坐却娉婷
白麻早晚下天庭

又

玉節珠幢出翰林詩書謀帥眷方深
威聲虎嘯復龍吟
我是先生門下士相逢有酒且教斟
高山流水遇知音

又

絕代佳人淑且真
雪為肌骨月為神
燭前花底不勝春
倚竹袖長寒捲翠
凌波鞵小暗生塵
十分京洛舊家

人

又

妙手何人為寫真
只將傳處是精神
一枝占斷洛城春
暮雨不堪巫峽夢
西風莫障庾公塵
扁舟湖海要詩

人

又 瑞香

臘後春前別一般
梅花枯淡水仙寒
翠雲裘著紫霞冠
仙品只今推第一
清香元不是人間
為君更試小龍

團

又 饒鄭憲

寶蠟燒春夜影紅
梅花枝傍錦薰籠
曲瓊低捲瑞香風
萬里江山供燕几
一時賓主看談鋒
問君歸計莫匆匆

又 親舊斲口相訪

六客西來共一舟
吳兒蹋浪剪輕鷗
水光山色翠相浮
我欲吹簫明月下
略須停棹晚風頭
從前五度到斲

州

又

已是人間不繫舟
此心元自不驚鷗
卧看駭浪與天浮
對月只應頻舉酒
臨風何必更搔頭
暝煙多處是神

州

又

冉冉幽香解鈿囊
蘭橈煙雨暗春江
十分清瘦為蕭郎
遙憶牙檣收楚纜
應將玉筍點吳粧
有人縈斷九回腸

又

樓下西流水拍堤樓頭日日望春歸
雪晴風靜燕來遲
留得梅花供半額
要將楊葉畫新眉
莫教辜負早春時

又 去荊州

方船載酒下江東
簫鼓喧天浪拍空
萬山紫翠映雲重
擬看岳陽樓上月
不禁石首岸頭風
作牋我欲問龍

公

又
次韻戲馬夢
山與妓作別

羅韞生塵洛浦東
美人春夢瑣窗空
眉山感恨幾千重
海上蟠桃留結子
渥洼天馬去追風
不須多怨主人

公

又夢山未釋然再作

一片西飛一片東高情已逐落花空舊歡休問幾時重
結習正如刀舐蜜掃除須著絮因風請君持此問龐

公

又

鵲樓高晚雪融鴛鴦池暖暗潮通鬱金黃染柳絲風
油壁不來春草綠闌干倚徧夕陽紅江南山色有無

中

又

妬婦灘頭十八姨顛狂無賴占佳期喚它滕六把春欺
懨懨鶯鶯并燕燕恹恹柳柳與梅梅東君獨自落便
宜

又 洞庭

行盡瀟湘到洞庭楚天闊處數峯青旗梢不動晚波平
紅蓼一灣紋纈亂白魚雙尾玉刀明夜涼船影浸疎
星

又坐上十八客

同是瀛洲冊府仙只今聊結社中蓮
胡笳按拍酒如川
喚起封姨清晚景更將荔子薦新園
從今三夜看嬋娟

娟

又用沈約之韻

細仗春風簇翠筵
爛銀袍拂禁爐煙
旃書名字壓宮垣
太學諸生推獨步
玉堂學士合登仙
乃翁種德蒲心

田

又 賦微之提刑繡扇

只說閩山錦繡幃，忽從團扇得生枝。
綢紅衫子映豐肌，春線應憐壺漏永。
夜針頻見燭花催，塵飛一騎憶來時。

又 煙水亭蔡定夫置酒

灩灩湖光綠一圍，修林斷處白鷗飛。
天機雲錦蘸空飛，乞我百弓真可老。
為公一飲醉忘歸，扁舟日日弄晴暉。

又

晚雨瀟瀟急做秋西風掠鬢已颼颼燭花明夜酒花浮

醉眼定知非妙賞

缺

詞端為

缺

留想君涇渭不同

流

又母氏生朝老者同在舟中

穩泛仙舟上錦帆桃花春浪舞清灣壽星相伴到人間

黃石公傳三百字西王母授九霞丹銀潢有路接三

山

又 貢茶沈水為楊齊伯壽

北苑春風小鳳團
炎州沉水勝龍涎
殷勤送與繡衣仙
玉食向來思苦口
芳名久合上凌煙
天教富貴出長年

又

霜日明霄水蘸空
鳴鞘聲裏繡旗紅
澹煙衰草有無中
萬里中原烽火北
一尊濁酒戍樓東
酒闌揮淚向悲風

又再用韻

宮柳垂垂碧照空
九門深處五雲紅
朱衣只在殿當中
細撚絲梢龍尾北
緩攜綸旨鳳池東
阿婆三五笑春風

又

日暖簾幃春晝長
纖纖玉指動抨牀
低頭佯不顧檀郎
豈蕊枝頭雙蛺蝶
芙蓉花下兩鴛鴦
壁間聞得啞茸香

又 侑劉恭父別酒

射策金門記昔年
又交藩翰入陶甄
不妨衣鉢再三傳
粉淚但能添楚竹
羅巾誰解繫吳船
捧盃猶願小留連

浪淘沙

琪樹間瑤林
春意深深
梅花還被曉寒禁
竹裏一枝斜
向我欲訴芳心
樓外卷重陰
玉界沉沉何人低唱醉
泥金掠水飛來雙翠
碧應寄歸音

又

溪練寫寒林雲重煙深樓高風惡酒難禁徙倚闌干誰
共語江上愁心清興滿山陰鴻斷魚沉一書何啻直
千金獨撫瑤徽絃欲斷憑寄知音

定風波

鈴索聲乾夜未央曲闌花影步淒涼莫道嶺南冬更暖
君看梅花如雪月如霜見說牆西歌吹好玉人扶坐
勸飛觴老子婆娑成獨冷誰省自挑寒炷自添香

望江南

贈談獻可

談子醉獨立睨東風未試玉堂揮翰手只今楚澤釣魚
翁萬事舉杯空 謀一笑一笑與君同身老南山看射
虎眼高四海送飛鴻赤岸晚潮通

又 南嶽銓德觀作

朝元去深殿扣瑤鐘天近月明黃道冷參回斗轉碧霄
空身在九光中 風露下環珮響丁東玉案燒香縈翠
鳳松壇移影動蒼龍歸路海霞紅

醉落魄

輕黃澹綠可人風韻閒裝束多情早是眉峯蹙一點秋
波閒裏覩人毒 桃花庭院光陰速銅鞮誰唱大堤曲
歸時想是櫻桃熟不道秋千誰伴那人蹴

桃源憶故人

朔風弄月吹銀霰簾幙低垂三面酒入玉肌香軟壓得
寒威斂槽檀 乍撚么絲慢彈得相思一半不道有人
腸斷猶作聲聲顫

臨江仙

試問梅花何處好與君藉草攜壺西園清夜片塵無一
天雲破碎兩樹玉扶疎誰摩挲昭華吹古怨散花便滿
衣裾只疑幽夢在清都星稀河影轉霜重月華孤

又

問訊宜樓樓下竹年來應長新篁使君五嶺又三湘舊
游知好在熟處更難忘尚念論心舒歎否只今湖海
相望遙憐陰過酒尊涼舉觴須酌我門外是清江

如夢令

木樨

花葉相遮相映雨過翠明金潤折得一枝歸滿路清香
成陣風韻風韻寄贈綺窓雲鬢

于湖集卷三十三

欽定四庫全書

于湖集卷三十四

宋 張孝祥 撰

樂府

菩薩蠻

立春

絲金縷翠幡兒小裁羅襖線花枝裊明日是新春春風
生鬢雲 吳霜看點點愁裏春來淺只願此花枝年年
長帶伊

又 諸客赴東鄰之集

庭葉翻翻秋向晚涼砧敲月催金剪樓上已清寒不堪
頻倚欄 鄰翁開社甕喚客情應重不醉且無歸醉時
歸路迷

又

恰則春來春又去憑誰說與春教住與閒坐中人幾回
迎送春 明年春更好只怕人先老春去有來時願春
長見伊

又

東風約略吹羅幕一簷細雨春陰薄試把杏花看濕紅
嬌暮寒 佳人雙玉枕烘醉鴛鴦錦折得最繁枝暖香
生翠幃

又 贈寧妓

琢成紅玉纖纖指十三絃上調新水一弄入雲聲月明
天更清 匆匆鶯語嚀待寫昭君怨寄語莫重彈有人
愁倚欄

又

玉龍細點三更月庭花影下餘殘雪寒色到書幃有人
清夢迷 牆西歌吹好燭煖香閨小多病怯盃觴不禁
冬夜長

又 登浮玉亭

江山佳處留行客醉餘老眼迷空碧獨倚最高樓乾坤
日夜浮 微風吹笑語白日魚龍舞此意忽忽翩翩憑虛
吾欲仙

又

雪消牆角收燈後野梅官柳春全透池閣又東風燭花
燒夜紅一尊留好客倚盡闌干月已醉不須歸試聽
烏夜啼

又

溶溶花月天如水闌干小倚東風裏夜久寂無聲露濃
花氣清悠然心獨喜此意知何意不似隱牆東燭花
圍坐紅

又夜坐清心閣

暗潮清漲蒲塘晚
斷雲不隔東歸遠
堂上晚風涼藕花
開處香
夜航人不渡
白鷺雙飛去
待得月華生
攜筇獨自行

又

縹緲飛來雙綠鳳
雨疎雲澹撩清夢
蘭薄未禁秋月華
如水流
采香溪上路
愁蒲參差樹
獨倚晚樓風
斷霞
縈素空

又

薜蘿白芷愁煙渚曲瓊細卷江南雨心事怯衣單樓高
生晚寒雲鬟香霧濕翠袖淒餘泣春去有來時春從
沙際歸

又 艤舟采石

十年長作江頭客檣竿又掛西風席白鳥去邊明楚山
無數青倒冠仍落珮我醉君須醉試問識君不青山
與白鷗

又 和州守胡明秀席上

乳羝屬國歸來早知君膽大身猶小一節不須論功名
看致君 鎮西樓上酒父老為公壽更祝太夫人年年
封詔新

又

胭脂淺染雙珠樹東風到處嬌無數不語恨厭厭何人
思故園 故園花爛漫笑我歸來晚我老只思歸故園
花雨時

又與同舍游湖歸

吳波細卷東風急，斜陽半落蒼煙濕。
一棹采菱歌，倚欄人奈何。
天公憐好客，酒面風吹白。
更引十玻璃，月明騎鶴歸。

又

冥濛秋夕溥清露，玉繩耿耿銀潢注。
永夜滴銅壺，月華樓影孤。
佳人紆絕唱，翠幙叢霄上。
休勸玉東西，烏鵲枝上啼。

西江月

問訊湖邊春色重來又是三年東風吹我過湖船楊柳
絲絲拂面 世路如今已慣此心到處悠然寒光亭下
水如天飛起沙鷗一片

又

風定灘聲未已雨來篷底先知岸邊楊柳最憐伊憶得
船兒曾繫 湖霧平吞白塔茅簷自有青旗三杯村酒
醉如泥天色寒呵且睡

又 重九

冉冉寒生碧樹盈
露濕黃花故人玉
節有光華
高會仍逢戲馬
萬事只今如夢
此身到處為家
與君相遇更天涯
拚了茱萸醉把

又 張敬夫壽

諸老何煩薦口
先生自簡淵衷
千年聖學有深
功妙處無非日
用已授一編
圮下却須三顧
隆中鴻鈞早晚
轉春風我亦從
君賈勇

欽定四庫全書

子淵
卷三十四

又代五三弟
為老母壽

慈母行封大國老仙早上蓬山天憐陰德徧人間賜與
還丹七返莫問清都紫府長教綠鬢朱顏年年今日
綠衣斑兄弟同扶酒盞

又
此
斷倅李君達才當靖康建炎之間以諸生起
兵河東屢摧強敵蓋未知其事重為感嘆賦

不識平原太守向來水北山人世間功業漫虧成華髮
蕭蕭蒲鏡幸有田園故里聊分風月江城西湖西畔

晚波平袖手時來照影

又

樓外疎星印水樓頭畫燭烘簾憑高舉酒恨厭厭征路
虛無指點酒興因君開闊山容向我增添一鉤新月
弄纖纖濃霧花房半斂

又阻風三峯下

滿載一船秋色平鋪十里湖光波神留我看斜陽放起
鱗鱗細浪明日風回更好今宵露宿何妨水晶宮裏

秦寬裳準擬岳陽樓上

又 桂州同僚餞別

窓戶青紅尚濕主人已作歸期坐中賓客盡鄙枚盛事
它年應記 別酒深深但勸離歌緩緩休催扁舟明日
轉清溪好月相望千里

又 以隋索靖小字法華
經及古器為老人壽

漢鑄九金神鼎隋書小字蓮經剛風劫火轉青冥護守
應煩仙聖 昨夢歸來帝所今朝壽我親庭只將此寶

伴長生談笑中原底定

又

飲百花亭為武夷樞密先生作亭望廬山雙劍峯為惡竹所蔽是夕盡伐去

落日鎔金萬頃晴嵐洗劍雙鋒紫樞元是黑頭公佳處
因君愈重分得湖光一曲喚回廬嶽千峯清尊今夜
偶然同早晚商巖有夢

又

為樞密太夫人壽

疇昔通家宿契只今兩鎮交承起居樞密太夫人綠鬢
斑衣相映乞得神仙九醞祝教福祿千春台星直上

壽星明長見門闌鼎盛

減字木蘭花

江陰州治漾花池

佳人絕妙不惜千金頻買笑
燕婉鶯嬌始遣清歌透碧霄
玉人好事更倒一尊留客醉
我醉思家月滿南池欲漾花

又

一尊留夜寶蠟烘簾光激射
凍合銅壺細聽冰簷夜剪酥
清愁冉冉酒喚紅潮登玉臉
明日重看玉界瓊樓

特地寒

又

愛而不見立馬章臺空便面想像娉婷只恐丹青畫不成
詩人老去恰要鶯鶯相伴住試與平章歲晚教人枉斷腸

又

阿誰曾見馬上牆陰通半面玉立娉婷一點靈犀寄目成
明朝重去人在橫溪溪畔住喬木千章搖落霜風

只斷腸

又琵琶亭林守王倅送別

江頭送客楓葉荻花秋瑟瑟絃索休彈清淚無多怕濕
衫故人相遇不醉如何歸得去我醉忘歸煙滿空江
月滿堤

又二十六日立春

春如有意未接年華春已至春事還新多得年時五日
春春郊便綠只向臘前春已足屈指元宵正是新春

二十朝

又 黃堅叟母生日

慈闈生日見說今年年九十戲綵盈門大底孩兒七箇
孫人問喜事只這一般難得似願我雙親都似君家
太淑人

又 贈尼師舊蕭妓也

吹簫汎月往事悠悠休更說拍碎琉璃始覺從前萬事
非清齋淨戒休作斷腸垂淚債識破囂塵作箇逍遙

物外人

又

人間奇絕只有梅花枝上雪有箇人人梅樣風標雪樣
新芳心不展嫩綠陰陰愁冉冉一笑相看試薦冰盤
一點酸

又

柳花搦柳知道東君留意久慘綠愁紅憔悴都因一夜
風輕狂蝴蝶擬欲扶持心又怯要免離披不告東君

更告誰

清平樂

殿廬有作

光塵撲撲宮柳低迷綠鬪鴨闌干春詒曲簾額微風繡
甍碧雲青翼無憑困來小倚銀屏楚夢不禁春晚黃
鸝猶自聲聲

又 楊侯書院聞酒所奏樂

油幢畫戟玉鉉調春色熏閣諸郎俱第一風流前輩敵
玉人雙鞵華鑣翠雲深處消搖有客留君東閣時聞

風下笙簫

又梅

吹香嚼蕊獨立東風裏玉凍雲嬌天似水羞殺天桃濃
李如今見說闌干不禁月冷霜寒隴上驛程人遠樓
頭戍角聲乾

又壽叔父

英姿慷慨獨立風塵外湖海平生豪氣在行矣雲龍際
會充庭蘭玉森森一觴共祝修齡此地去天尺五明

年持橐西清

又

向來省戶謀國參伊呂暫借良籌非再舉談笑肅清三
楚良辰上客徜徉奏篇猶記傳香此日一罇相屬它
時同在巖廊

點絳脣

贈素立道

四到蘄州今年更是逢重九應時納祐隨分開尊酒
屢舞婆娑醉我平生友休回首世間何有明月踈踈柳

又 餞劉恭父

綺燕高張玉潭月麗玻璃滿旆霞行卷無復長安遠

夏木陰陰路裊薰風轉空留戀細吹銀管別意隨聲緩

又

萱草榴花畫堂晝永風清暑麝團菰黍助泛菖蒲醑

兵辟神符命續同心縷宜歡聚綺筵歌舞歲歲酬端午

卜筭子

雪月最相宜梅雪都清絕去歲江南見雪時月底梅花

發 今歲早梅開依舊年時月冷豔孤光照眼明只欠些兒雪

訴衷情

中秋不見月

晚煙斜日思悠悠西北有高樓十分準擬明月還似去年遊
飛玉斚卷瓊鉤喚新愁姮娥貪共暮雨朝雲忘了中秋

又牡丹

亂紅深紫過羣芳初欲減春光花王自有標格塵外鎖

韶陽 留國艷問仙鄉自天香翠帷遮日紅燭通宵與
醉千場

好事近

木樨

一朵木犀花珍重玉纖新摘插向遠山深處占十分秋
色 滿園桃李鬧春風漫紅紅白白爭似淡粧嬌面伴
蓬萊仙客

又 冰花

萬瓦雪花浮應是化工融結仍看牡丹初綻有層層千

葉 鑊冰剪水更鮮明說道真奇絕來報主人佳兆慶
我公還闕

南歌子

仲彌性席上

曾到蘄州不人人說使君使君才具合經綸小試邊城
早晚上星辰 佳節重陽近清歌午夜新舉杯相屬莫
辭頻後日相思我已是人

又 贈吳伯承

人物羲皇上詩名沈謝間漫郎元自漫為官醉眼夢騰

只擬看湘山 小隱今成趣
鄰翁獨往還 野堂梅柳尚
春寒 且趁華燈頻泛酒 船寬

霜天曉角

柳絲無力冉冉 縈愁碧 繫我船兒不住 楚江上 晚風急
棹歌休怨抑 有人離恨極 說與歸期不遠 剛不信 淚
偷滴

生查子

遠山眉黛橫 媚柳開青眼
樓閣斷霞明 簾幙春寒淺

杯延玉漏遲燭怕金刀剪明月忽飛來花影和簾卷

長相思

小樓重下簾櫳萬點芳心綠間紅鞦韆圖畫中
草茸茸柳鬆鬆細卷玻璃水面風春寒依舊濃

憶秦娥

元夕

元宵節鳳樓相對黿山結黿山結香塵隨步柳梢微月
多情又把珠簾揭遊人不放笙歌歇笙歌歇曉煙輕
散帝城宮闕

蒼梧謠

饒劉恭父

歸十萬人家兒樣啼公歸去何日是來時

又

歸獵獵薰風颭繡旗攔教住重舉送行盃

又

歸數得宣麻拜相時秋前後公袞更萊衣

于湖集卷三十四